

ESTATUTOS DO CLUB VIGO RUÍNS

CAPÍTULO I: NORMAS XERAIS

Artigo 1º.- Denominación social

O club **Vigo Ruíns Jugger Club** é unha Asociación privada con personalidade xurídica e capacidade de obrar, integrada por persoas físicas ou xurídicas, con personalidade xurídica propia e capacidade de obrar.

Artigo 2º.- Obxecto social

O club ten como obxecto primordial o fomento e o impulso da práctica continuada dunha ou varias modalidades deportivas, así como a participación en actividades e competicións deportivas calquera que sexa o seu nivel e destinatario, mediante a creación de cantos equipos se consideren necesarios.

A súa principal modalidade deportiva é o **jugger** e solicitará a ratificación dos Estatutos e a inscrición no Rexistro de Entidades Deportivas de Galicia, de conformidade coa Lei do Deporte de Galicia.

Así mesmo terá tamén actividade nos denominados como **e-sports**, e para tal fin funcionarán as seccións deportivas correspondentes, sen prexuízo de que a Asemblea Xeral poida acordar a creación doutras.

Artigo 3º.- Domicilio social

O domicilio fíxase na Rúa Tomás Alonso, n.º 17, 1º F (CP: 36209, VIGO). Encóntrase esta cidade na provincia de PONTEVEDRA, e por tanto na Comunidade Autónoma de Galicia.

O Presidente, cando as circunstancias o aconsellen, poderá acorda-lo cambio do domicilio social dentro da mesma localidade. Para o traslado do domicilio a outra localidade, que deberá ser sempre dentro do territorio da Comunidade Autónoma de Galicia, será necesario o acordo maioritario da Asemblea Xeral Extraordinaria.

En ámbolos casos, o traslado de domicilio social non implicará modificación estatutaria, e terá que ser notificado ós socios e ó Rexistro de Entidades Deportivas de Galicia.

CAPÍTULO II: CLASES DE SOCIOS, ADMISIÓN, DEREITOS E OBRIGACIÓNS

Artigo 4º.- Clases de socios

O número de socios será ilimitado. A Asemblea Xeral poderá suspender, non obstante, a admisión de novos socios cando así o esixan razóns de aforo ou capacidade física das instalacións.

Os socios poderán ser das seguintes clases: de número, honorarios, aspirantes e familiares.

Artigo 5º.- Definición das clases

- Socios de número: tódalas persoas maiores de idade, que satisfagan a cota social establecida pola Asemblea Xeral.
- Socios aspirantes: os menores de 18 anos. Terán dereito ó uso das instalacións sociais mediante a cota que se fixe e pasarán automaticamente a ser socios de número ó cumpriren a maioría de idade.
- Socios honorarios: aquelas persoas ás que a Asemblea Xeral confira esta distinción. Terán un posto de preferencia nos actos oficiais da sociedade.
- Socios familiares: todas aquelas persoas que dependan economicamente dun socio de número e convivan con el no mesmo domicilio.

Artigo 6º.- Dereitos dos socios

1.- Os socios de número terán os seguintes dereitos:

- Contribuír ó cumprimento dos fins específicos da Asociación.
- Esixir que a Asociación se axuste ó disposto na normativa autonómica deportiva e ó establecido no presente Estatuto.
- Separarse libremente da Asociación.
- Coñece-las actividades da Asociación e examina-la súa documentación, previa petición razoada ó Presidente.
- Expor libremente as súas opinións no seo da Asociación.
- Ser electores e elixibles para os órganos de representación e goberno da Asociación, sempre que teñan plena capacidade de obrar.

2.- Son obrigacións dos socios de número:

- Aboa-las cotas que esixa a Asemblea Xeral.
- Contribuír ó sostemento e difusión do deporte ou modalidades deportivas.
- Acatar cantas disposicións dite a Asemblea Xeral, a Xunta Directiva ou o Presidente, para o bo goberno da sociedade.

3.- Os socios aspirantes terán dereito a aproveitarse dos servizos e instalacións sociais da Asociación.

4.- Os socios familiares de número terán dereito a aproveitarse daqueles servizos e instalacións que se determinen, previo pago da cota fixada.

Artigo 7º.- Requisitos para asociarse

Para ser admitido como socio, en calquera das súas modalidades, será necesario:

- Te-la idade sinalada en cada unha delas.
- Presentar unha solicitude por escrito dirixida ó Presidente.
- Satisface-la cota de ingreso correspondente.

Artigo 8º.- A condición de socio pérdese

- Por vontade propia.
- Por falta de pago das cotas sociais durante tres meses consecutivos, previo requirimento de pago e consecuente Resolución do Presidente.

- Por acordo do Presidente. No seu caso, fundado en faltas de carácter grave, previa audiencia do interesado, que haberá de ser ratificado na primeira Asemblea Xeral que se celebre.
- Por calquera outra causa establecida na lexislación vixente.

CAPÍTULO III: ÓRGANOS DE REPRESENTACIÓN E GOBERNO

Artigo 9º.- Órganos

Son Órganos de representación e goberno do Club: a Asemblea Xeral e o Presidente.

Artigo 10º.- O Presidente

O Presidente é o órgano executivo do Club, posúe a representación legal e convoca e preside os órganos de representación e goberno, executando os acordos destes. É un cargo a título gratuíto e carente de interese nos resultados económicos da explotación, por si mesmo ou a través de persoa interposta.

Será elixido cada 4 anos mediante sufraxio libre, directo, igual e secreto por e entre os membros da Asemblea Xeral.

O Presidente cesará por:

- Transcorre-lo prazo polo que foi elixido.
- Dimisión.
- Falecemento ou incapacidade física ou psíquica para continuar no exercicio do seu cargo.
- Aprobación dunha moción de censura pola Asemblea Xeral.
- Inhabilitación por sentenza xudicial firme ou sanción deportiva.

Artigo 11º.- A Xunta Directiva

1.- Como órgano complementario dos de goberno e representación poderá haber unha xunta directiva que actuará como órgano colexiado de xestión do Club, e exercerá as funcións que este Estatuto lle confire.

2.- Os membros da Xunta Directiva serán designados e revogados libremente polo Presidente, debendo dar conta diso na primeira Asemblea Xeral que se celebre. Da mesma formará parte un secretario e un tesoureiro.

3.- Tódolos cargos serán gratuítos e carecerán de interese nos resultados económicos do Club, por si mesmo ou a través de persoa interposta.

Artigo 12º.- Reunións da Xunta Directiva

1.- A Xunta Directiva quedará validamente constituída en primeira convocatoria cando concorran a ela a maioría dos seus membros. En segunda convocatoria será suficiente a concurrencia, polo menos, de tres dos seus membros, e, en todo caso, do Presidente.

2.- O Presidente convocará a Xunta Directiva con dous días de antelación á data de celebración, como mínimo.

A Xunta Directiva quedará tamén validamente constituída cando estean presentes tódolos seus membros, aínda que non mediase convocatoria previa.

3.- En especial corresponde á Xunta Directiva:

- a) Dirixir a xestión do Club, velando polo cumprimento do seu obxecto social.
- b) Formular o inventario, memoria e orzamento anual, que se someterá a aprobación da Asemblea.
- c) Aplicar tódalas medidas deportivas, económicas e administrativas precisas para o fomento e desenvolvemento do deporte dentro do Club.

Artigo 13º.- O Secretario

O Secretario da Xunta Directiva coidará do arquivo da documentación, redactará cantos documentos afecten á marcha administrativa da Asociación e levará o Libro de rexistro de socios e o Libro de Actas.

Artigo 14º.- O Tesoureiro

1.- O Tesoureiro da Xunta Directiva será o depositario da Asociación, asinará os recibos, autorizará os pagos e levará os Libros de Contabilidade.

2.- Será obriga do Tesoureiro formalizar, durante o primeiro mes de cada ano, un balance de situación e as contas de ingresos e gastos, que se porán en coñecemento de tódolos asociados.

Artigo 15º.- A Asemblea Xeral

1.- A Asemblea Xeral é o órgano supremo de goberno do Club e estará integrada por tódolos seus socios de número.

2.- As Asembleas Xerais, tanto Ordinarias como Extraordinarias, quedarán validamente constituídas en primeira convocatoria cando concorran a ela a maioría dos seus asociados. En segunda e última convocatoria media hora máis tarde, considerarase constituída de concorrer o vinte e cinco por cento dos asociados.

Entre a data de convocatoria e o día sinalado para a súa celebración terán de mediar, como mínimo, dez días naturais e non poderán transcorrer máis de vinte.

3.- A Asemblea Xeral convocarase polo Presidente a iniciativa propia ou a petición do vinte e cinco por cento, ó menos, dos socios de número.

Artigo 16º.- A Asemblea Ordinaria

A Asemblea Xeral reunirase con carácter ordinario, previa convocatoria do Presidente, ó menos unha vez ó ano para tratar das seguintes cuestións:

- a) Memoria, liquidación do orzamento, balance do exercicio, rendición de contas e aprobación, se procede.
- b) Orzamento para o seguinte exercicio.
- c) Proxecto e propostas do Presidente ou da Xunta Directiva.
- d) Proposicións que formulen os socios, que haberán de ir asinadas, ó menos, polo cinco por cento dos mesmos.

Artigo 17º.- A Asemblea Extraordinaria

Terá que se celebrar Asemblea Xeral Extraordinaria para a modificación de Estatutos, elección do Presidente, toma de cartos a préstamo, emisión de títulos representativos de débeda ou de parte alícuota patrimonial, enaxenación de bens inmoables e fixación de cotas dos socios, e calquera outro acordo previsto nestes Estatutos ou que estime oportuno o Presidente ou proceda legalmente.

Artigo 18º.- Obtención de acordos

Os acordos da Asemblea Xeral adoptaranse por maioría simple dos presentes, salvo cando o obxecto do asunto sexa un dos comprendidos no artigo anterior, que requirirá os votos favorables de, como mínimo, dous terzos dos presentes.

Serán vinculantes e de obrigado cumprimento e terán forza executiva a partir da data da súa adopción, sen prexuízo, por razón da materia, da posibilidade da súa impugnación perante os órganos competentes e da Federación Galega Deportiva da modalidade ou perante o Comité Galego de Xustiza Deportiva.

CAPÍTULO IV: RÉXIME DOCUMENTAL

Artigo 19º.- Réxime documental

O réxime documental do Club constará dos seguintes libros: Rexistro de Socios, de Actas e Contables.

Artigo 20º.- Rexistro de Socios

No libro de Rexistro de Socios terán que consta-los nomes e apelidos dos socios de número, o seu Documento Nacional de Identidade e, no seu caso, os cargos de representación, goberno e administración que exerzan no Club.

Tamén se haberán de especifica-las datas de altas e baixas, e as de toma de posesión e cese nos cargos aludidos.

Artigo 21º.- Libro de Actas

No Libro de Actas consignaranse as reunións que celebre a Asemblea Xeral e a Xunta Directiva, con expresión da data, asistentes, asuntos tratados e acordos adoptados. As Actas terán que estar asinadas, en todo caso, polo Presidente e o Secretario.

Artigo 22º.- Libro de Contabilidade

Nos Libros de Contabilidade figurarán tanto o patrimonio como os dereitos e obrigacións, e ingresos e gastos do Club, debéndose precisa-la procedencia daqueles e a inversión ou destino destes.

CAPÍTULO V: RÉXIME DISCIPLINARIO

Artigo 23º.- Sometemento ó réxime

Os órganos e socios do Club estarán sometidos ó regulamento disciplinario do Club e ó disposto no Título VII da Lei 3/2012 do Deporte de Galicia, e a súa normativa de desenvolvemento.

Artigo 24º.- Responsabilidade

Así mesmo o Presidente e os membros da Xunta Directiva responderán fronte ós socios, o Club ou terceiros dos prexuízos que ocasionaren por culpa ou negligencia grave, de conformidade coa regulamentación propia do Club e o Ordenamento Xurídico vixente.

CAPÍTULO VI: RÉXIME ECONÓMICO-FINANCEIRO E PATRIMONIAL

Artigo 25º.- Patrimonio

1. No momento da creación do Club deportivo, o patrimonio fundacional é dun euro, sen dispor de instalacións ou locais propios.

2. No futuro o patrimonio do Club estará integrado por:

- a) As achegas económicas dos socios que aprobe a Asemblea Xeral.
- b) As doazóns e subvencións que reciba.
- c) Os resultados económicos que poden producir as manifestacións físico-deportivas que organice a entidade.
- d) As rendas, froitos e intereses do seu patrimonio.

Queda expresamente excluído como fin do Club o ánimo de lucro e a totalidade dos seus ingresos e beneficios aplicaranse ó cumprimento dos seus fins sociais.

Artigo 26º.- Gravame, préstamos e vendas

O Club poderá gravar e allear bens, mobles e inmobles, tomar diñeiro a préstamo e emitir títulos transmisibles representativos de débeda ou parte alícuota patrimonial, sempre que cumpra os seguintes requisitos:

- Que se autoricen as operacións por maioría de dous terzos dos socios presentes e representados na Asemblea Xeral Extraordinaria.
- Que ditos actos non comprometan de modo irreversible o patrimonio da Entidade ou a actividade físico-deportiva que constituía o seu obxecto social. Para a adecuada xustificación deste extremo poderase esixir, sempre que o solicite como mínimo o cinco por cento dos socios de número, o oportuno ditame económico actuarial.
- Cando se trate de gravar ou allear bens, mobles e inmobles, que fosen financiados en todo ou parte con Fondos Públicos da Comunidade Autónoma, será preceptiva a autorización previa do órgano competente da Xunta de Galicia.

Artigo 27º.- Títulos de débeda

O Club poderá emitir títulos de débeda ou de parte alícuota patrimonial, que serán nominativos. Os títulos inscribíranse nun libro que levará ó efecto o Club, no que se anotarán as sucesivas transferencias.

En tódolos títulos constará o valor nominal, a data de emisión, e, no seu caso, o interese e prazo de amortización.

Estes títulos de débeda só se poderán subscribir por parte dos asociados, e a súa posesión non

conferirá dereito algún especial ós socios, agás a percepción renunciábel dos intereses establecidos conforme á lexislación vixente.

Os títulos de parte alícuota patrimonial han ser, asemade, subscritos polos asociados, unicamente podendo ser transferidos entre eles. En ningún caso estes títulos darán dereito á percepción de dividendos ou beneficios.

CAPÍTULO VI: REFORMA DOS ESTATUTOS E DISOLUCIÓN DO CLUB

Artigo 28º.- Modificacións estatutarias

Os presentes Estatutos só se poderán modificar, reformar ou derrogar por acordo da Asemblea Xeral Extraordinaria convocada a tal efecto, mediante votación favorable dos dous terzos dos socios de número asistentes.

A reforma destes Estatutos seguirá, con respecto ó Rexistro Entidades Deportivas de Galicia, os mesmos trámites administrativos que para a súa inscrición.

Artigo 29º.- Extinción do Club

O Club extinguirase ou disolverase:

- a) por acordo dos dous terzos dos socios en Asemblea Xeral Extraordinaria, convocada ó efecto;
- b) por sentenza xudicial;
- c) por outras causas legalmente determinadas.

En todo caso haberá de ser notificado ó Rexistro de Entidades Deportivas.

Artigo 30º.- Patrimonio social trala disolución

Disolto o Club, o remanente do seu patrimonio social, de habelo, aplicarase a fins análogos de carácter deportivo, ben por acordo previo da Asemblea Xeral ou subsidiariamente polo órgano competente en materia de deporte da Xunta de Galicia.